

07 APR 1996

Carl Bildt

SIDANG BRUSSELS SEPERTI YANG DIJADUALKAN: BILDT

KUALA LUMPUR, 7 April (Bernama) -- Perwakilan Tertinggi Antarabangsa ke Bosnia-Herzegovina Carl Bildt hari ini mengesahkan Persidangan Brussels akan diadakan mengikut jadual walaupun tanpa kehadiran wakil puak Serb Bosnia.

"Persidangan kedua negara penderma di Brussels akan diteruskan meskipun tidak banyak perkembangan daripada Serb Bosnia," katanya kepada Bernama di Lapangan Terbang Sultan Abdul Aziz Shah di Subang sebelum berlepas ke Tokyo.

Beliau berkata persidangan dua hari itu yang bermula Jumaat ini dijangka dihadiri kira-kira 50 hingga 60 negara.

Persidangan itu bertujuan mengumpulkan wang bagi pembinaan semula Bosnia-Herzegovina. Sebanyak AS\$1.2 bilion dalam bentuk ikrar kepada Bosnia akan dikumpul tahun ini sebagai tambahan kepada AS\$600 juta yang dijanjikan tahun lepas.

Bildt yang tiba di sini semalam untuk persinggahan dua hari untuk mendapatkan sokongan Malaysia bagi pembinaan semula negara Balkan itu, berkata Malaysia telah memainkan peranan penting di kalangan negara-negara Pertubuhan Persidangan Islam (OIC) ke arah membangunkan semula negara bekas Yugoslavia itu.

Satu laporan baru-baru ini menyebut persidangan itu akan dibatalkan melainkan 88 tawanan perang Bosnia yang ditahan oleh puak-puak yang bertelagah

-- Islam Bosnia, Croat dan Serb -- dibebas.

Bidlt berkata beliau yakin persidangan Brussels itu akan menghasilkan sesuatu yang positif meskipun tanpa kehadiran puak Serb Bosnia.

Mengenai lawatan singkatnya ke Malaysia, bekas Perdana Menteri Sweden itu berkata pertemuannya dengan Perdana Menteri Datuk Seri Dr Mahathir Mohamad dan Menteri Luar Datuk Abdullah Haji Ahmad Badawi, telah membayangkan kesediaan Malaysia untuk menghulurkan bantuan bagi pembinaan semula Bosnia.

Bidlt yang pernah melawat Malaysia pada 1994 semasa mengetuai kerajaan Sweden berkata lawatannya ke Jepun mempunyai misi yang sama dan berharap dapat menemui Perdana Menteri, Menteri Luar dan Menteri Kewangan negara itu.

Katanya, Jepun adalah sebuah lagi negara yang telah membayangkan kesediaan untuk membantu dalam pembinaan semula Bosnia.

Bidlt yang diiringi oleh penasihat khas Dame Pauline Neville-Jones dan dua lagi pegawai akan terus ke Sarajevo dari Tokyo sebelum ke Brussels.

Malaysia dijangka diwakili oleh Menteri Pertahanan Datuk Syed Hamid Albar, yang juga akan menghadiri mesyuarat Kumpulan Menggerakkan Bantuan OIC Bagi Bosnia-Herzegovina di Sarajevo.-- BERNAMA.

SJA OBA.